

南無本師釋迦牟尼佛（三稱）

無上甚深微妙法 百千萬劫難遭遇
我今見聞得受持 願解如來真實義

悲華經卷第五

諸菩薩本授記品第四之三

佛告寂意菩薩：「善男子！爾時，寶海梵志復白第十王子軟心言，乃至發心亦復如是。王子所願皆如阿閼菩薩所願，白佛言：『世尊！若我所願成就得己利者，令一切眾生悉得思惟諸佛境界，手中自然生梅檀香、優陀婆羅香，以此諸香供養諸佛。』」

爾時寶藏如來讚王子言：『善哉善哉！善男子！汝所願者甚奇甚特，汝願眾生手中自然有梅檀香、優陀婆羅香，悉得思惟諸佛境界繫念清淨。以是故今改汝字號為香手。』佛告香手：『善男子！未來之世過一恆河沙等阿僧祇劫，入第二恆河沙等阿僧祇劫後分之中，阿閼如來般涅槃後正法滅盡過七日已，汝於是時當成阿耨多羅三藐三菩提，其佛世界故名妙樂，佛號金華如來、應供、正遍知、明行足、善逝、世間解、無上士、調御丈夫、天人師、佛、世尊。』

爾時，香手菩薩復作是言：『世尊！若我所願成就得己利者，今我禮佛，此閻浮園周匝當雨諸蒼蔔華。』善男子！爾時

香手菩薩於寶藏佛前頭面著地，是時閻浮園中如其所言周匝遍雨諸蒼蔔華。

爾時，寶藏如來為香手菩薩而說偈言：

尊妙功德 善趣汝起 如心所願 雨蒼蔔華
度脫無量 一切眾生 示諸善道 令至無畏

善男子！爾時，香手菩薩聞是偈已心大歡喜，即起合掌前禮佛足，去佛不遠復坐聽法。

善男子！爾時，寶海梵志復白第十一王子瞿伽奴言，乃至發心亦復如是。王子所願亦如香手菩薩所願。爾時師子王子以珍寶幢供養寶藏如來，時佛即讚師子王子言：『善哉善哉！善男子！汝今以此寶幢供養是故號汝名為寶相。』

佛告寶相：『未來之世過一恆河沙等阿僧祇劫，入第二恆河沙等阿僧祇劫後分之中，妙樂世界金華如來般涅槃後，正法滅已過三中劫，妙樂世界轉名月勝，汝於是中當成阿耨多羅三藐三菩提，號龍自在尊音王如來、應供、正遍知、明行足、善逝、世間解、無上士、調御丈夫、天人師、佛、世尊。彼佛世界所有莊嚴，如妙樂世界等無差別。』

爾時寶相菩薩前白佛言：『世尊！若我所願成就得已利者，

我今頭面禮於佛足，令一切眾生得如是念，猶如菩薩住無諂三昧，一切眾生得大利益，生於大悲發菩提心。』善男子！爾時寶相菩薩在寶藏佛前頭面著地，一切眾生悉得如是無諂三昧得大利益，生於大悲發菩提心。

爾時寶藏如來為寶相菩薩而說偈言：

善意勤起 已於我前 為諸眾生 善作大誓
能大利益 無量眾生 令心無垢 是故來世
得成為佛 天人之尊

善男子！爾時，寶相菩薩聞是偈已心大歡喜，即起合掌前禮佛足，去佛不遠復坐聽法。

爾時，摩闍婆王子等五百王子作如是願：『願得如是種種莊嚴功德佛土，皆如虛空印菩薩摩訶薩所修淨土。』爾時寶藏如來皆為一一授阿耨多羅三藐三菩提記，同共一時各於餘國成無上道，如虛空印菩薩摩訶薩。

復次，四百王子作是誓願：『願取莊嚴淨妙佛土，皆如金剛智慧光明菩薩摩訶薩。』爾時寶藏如來亦為一一授阿耨多羅三藐三菩提記，同共一時各於異國成無上道，如金剛智慧光明菩薩摩訶薩。

復次八十九王子又作是願：『願取如是莊嚴佛土，如普賢菩薩摩訶薩所修佛土等無差別。』

爾時八萬四千小王各各別異作殊勝願，人人自取種種莊嚴上妙佛土。爾時寶藏如來各各與授阿耨多羅三藐三菩提記，當來之世各在餘國同共一時成無上道。

爾時九十二億眾生亦各發願，取種種莊嚴勝妙佛土。時寶藏如來一切皆與授阿耨多羅三藐三菩提記：『汝等來世，於餘國土同共一時成無上道。』

善男子！爾時，寶海梵志有八十子，即是寶藏如來之兄弟也，其最長子名海地尊。善男子！爾時寶海梵志告其長子言：『汝今可取微妙清淨莊嚴佛土。』其子答言：『惟願尊者先師子吼。』其父告言：『我之所願當最後說。』其子復言：『我今所願，當取清淨不清淨耶？』父復答言：『若有菩薩成就大悲，爾乃取於不淨世界。何以故？欲善調伏眾生垢故，如是之事汝自知之。』

善男子！爾時海地尊至寶藏如來所，在於佛前白佛言：『世尊！我願阿耨多羅三藐三菩提，若人有壽八萬歲時，如今佛世，爾乃成阿耨多羅三藐三菩提。我今又願令我國土所有眾生，薄婬恚癡厭離身心，怖畏生死見其過患，來至我所出家

學道，我於爾時為諸眾生說三乘法。世尊！若我所願成就得已利者，惟願世尊授我阿耨多羅三藐三菩提記。』

爾時寶藏如來告海地尊言：『善男子！未來之世過一恆河沙等阿僧祇劫，入第二恆河沙等阿僧祇劫，是時有劫名曰遍敷優鉢羅華，此佛世界當名願愛，是時人民壽八萬歲，汝於是中成阿耨多羅三藐三菩提，號曰寶山如來、應供、正遍知、明行足、善逝、世間解、無上士、調御丈夫、天人師、佛、世尊。』

爾時海地尊復作是言：『世尊！若我所願成就得已利者，此閻浮園周匝當雨赤色真珠，一切樹木自然皆出微妙伎樂。』善男子！時海地尊在寶藏佛前頭面作禮，當爾之時其園周匝雨赤真珠，一切樹木皆出種種微妙伎樂。

爾時寶藏如來即為摩納而說偈言：

大力汝起 無量智藏 慈悲眾生 作大利益
所願清淨 今得成就 當為眾生 作天人師

善男子！爾時，海地尊聞是偈已心大歡喜，即起合掌前禮佛足，去佛不遠復坐聽法。

梵志第二子名曰三婆婆，白佛言：『世尊！我今所願如海地

尊之所願也。』

爾時寶藏如來便告三婆婆言：『未來之世優鉢羅華劫中，願愛世界人壽轉多八十億歲，汝當於中得成阿耨多羅三藐三菩提，號曰日華如來、應供、正遍知、明行足、善逝、世間解、無上士、調御丈夫、天人師、佛、世尊。』

第三子所得世界亦復如是，人壽二千歲時成阿耨多羅三藐三菩提，號火香王如來乃至天人師、佛、世尊。第四成佛號須曼那，第五成佛號持戒王，第六成佛號善持目，第七成佛號梵增益，第八成佛號閻浮影，第九成佛號富樓那，第十成佛號曰勝妙，十一成佛號曰寶山，十二成佛號曰海藏，十三成佛號那羅延，十四成佛號曰尸棄，十五成佛號南無尼，十六成佛號曰覺尊，十七成佛號憍陳如，十八成佛號師子力，十九成佛號曰智幢，二十成佛號音聲，二十一成佛號尊勝佛，二十二成佛號離世尊佛，二十三佛號利益佛，二十四號智光明佛，二十五號師子尊佛，二十六號寂靜智佛，二十七號難陀佛，二十八號尼拘羅王佛，二十九號金色目佛，三十號得自在佛，三十一號曰樂佛，三十二號寶勝佛，三十三號善目佛，三十四號梵善樂佛，三十五號梵仙佛，三十六號梵音佛，三十七號法月佛，三十八號示現義佛，三十九號稱樂佛，四十號稱增益佛，四十一號端嚴佛，四十二號善香佛，四十三號眼勝佛，四十四號善觀佛，四十五號攝取義佛，四十六

號善意願佛，四十七號勝慧佛，四十八號金幢佛，四十九號善目佛，五十號天泓佛，五十一號淨飯佛，五十二號善見佛，五十三號毘琉璃幢佛，五十四號毘樓博叉佛，五十五號梵音佛，五十六號功德成就佛，五十七號有功德淨佛，五十八號寶光明佛，五十九號摩尼珠佛，六十號釋迦文手佛，六十一號音尊王佛，六十二號智和合佛，六十三號勝尊佛，六十四號成華佛，六十五號善華佛，六十六號無怒佛，六十七號日藏佛，六十八號尊樂佛，六十九號日明佛，七十號龍得佛，七十一號金剛光明佛，七十二號稱王佛，七十三號虎光明佛，七十四號相光明佛，七十五號刪尼輸佛，七十六號智成就佛，七十七號香王佛，七十八號娑羅王那羅延藏佛，七十九號火藏佛。

善男子！爾時梵志其最小子名離怖惱，在佛前住白佛言：『世尊！是七十九人佛今已為現前授記，於遍敷優鉢羅華劫，願愛世界人壽轉多時，成阿耨多羅三藐三菩提。世尊！我今佛前發阿耨多羅三藐三菩提心，優鉢羅華劫後分之中成阿耨多羅三藐三菩提時，如七十九佛所得壽命，願我壽命亦復如是。如七十九佛所度眾生，我所度眾生亦復如是。如七十九佛三乘說法，我亦如是說三乘法。如七十九佛聲聞弟子眾數多少，我之所得眾數多少亦復如是。是七十九佛於優鉢羅華劫所可教化無量眾生使受人身未得度者，我於來劫成阿耨多羅三藐三菩提已，悉當教化令住三乘。世尊！若我所願成就

得已利者，惟願世尊授我阿耨多羅三藐三菩提記。』

善男子！爾時寶藏佛即讚離怖惱言：『善哉善哉！善男子！汝今乃為無量眾生大慈悲心。善男子！未來之世過一恆河沙等阿僧祇劫，入第二恆河沙等阿僧祇劫，是中有劫名優鉢羅華，後分之中汝當成阿耨多羅三藐三菩提，號無垢燈山王如來、應供、正遍知、明行足、善逝、世間解、無上士、調御丈夫、天人師、佛、世尊。七十九佛所得壽命都合半劫，汝之壽命亦得半劫，如前所願悉得成就。』

爾時離怖惱菩薩復作是言：『世尊！若我所願成就得已利者，我今頭面敬禮於佛，令此世界周匝遍雨優鉢羅華微妙之香，若有眾生聞此香者身諸四大清淨無穢調適和順，一切病苦悉得除愈。』善男子！爾時離怖惱菩薩說是言已，尋以頭面敬禮佛足。爾時此佛世界尋時遍雨優鉢羅華微妙之香，眾生聞者身諸四大清淨無穢調適和順，一切病苦悉得除愈。

寶藏如來為是菩薩而說偈言：

善心慈悲 導師可起 諸佛世尊 咸稱讚汝
能斷堅牢 諸煩惱結 當來成善 淨智慧藏

善男子！爾時，離怖惱菩薩聞是偈已，心大歡喜，即起合掌前禮佛足，去佛不遠復坐聽法。

善男子！爾時寶海梵志有三億弟子，在園門外一處而坐，教餘眾生受三歸依令發阿耨多羅三藐三菩提心者。善男子！爾時梵志勸諸弟子作如是言：『汝等今者應發阿耨多羅三藐三菩提心取佛世界，今於佛前如心所求便可說之。』

是三億人中有一人名曰樹提，作如是言：『尊者！云何菩提？云何助菩提法？云何菩薩修行菩提？云何繫念得於菩提？

』

爾時其師報言：『摩納！如汝所問菩提者，即是菩薩之所修集四無盡藏。何等為四？所謂無盡福德藏、無盡智藏、無盡慧藏、無盡佛法和合藏。善男子！是名菩提。摩納！如佛所說助菩提法，所謂攝取助清淨度生死法門。善男子！捨財即是助菩提法，以調伏眾生故。持戒即是助菩提法，隨其所願得成就故。忍辱即是助菩提法，三十二相、八十種隨形好具足故。精進即是助菩提法，具足一切諸事故。禪定即是助菩提法，其心當得善調伏故。智慧即是助菩提法，以知一切諸煩惱故。多聞即是助菩提法，得無礙辯故。福德即是助菩提法，一切眾生之所須故。智即是助菩提法，成就無礙智故。寂滅即是助菩提法，柔軟善心得成就故。思惟即是助菩提法，成就斷疑故。慈心即是助菩提法，成就無礙心故。悲心即是助菩提法，教化眾生無厭足故。喜心即是助菩提法，於正

法中生愛樂故。捨心即是助菩提法，成就斷於愛憎法故。聽法即是助菩提法，成就滅五蓋故。出世即是助菩提法，成就捨除一切世間故。阿蘭若即是助菩提法，所作不善滅使不生，所有善根多增長故。念是助菩提法，成就護持故。意是助菩提法，成就分別諸法故。持是助菩提法，成就思議覺悟故。念處即是助菩提法，分別身受心法成就故。正勤即是助菩提法，以離一切不善法，修行一切善法增廣故。如意足是助菩提法，成就身心輕利故。諸根即是助菩提法，攝取諸根成就故。諸力即是助菩提法，摧滅一切煩惱故。覺是助菩提法，覺知實法故。六和敬即是助菩提法，調伏眾生令清淨故。摩訶！是名攝取助清淨度生死法門。』

樹提復言：『尊者！如佛所說，布施報即是大富得大眷屬，護持禁戒得生天上，廣博多聞得大智慧。又如佛說，思惟之法得度生死。』

師復報言：『摩訶！若樂生死故行布施，是故大富。摩訶！若善男子、善女人心向菩提，為心調伏故行布施，為心寂靜故持禁戒，為心清淨無有愛濁故求多聞，為大悲故思惟修道，其餘諸法智慧方便成就助求。摩訶！是名助菩提法。如是修行即是繫念得菩提也。摩訶！如是菩提今應生欲，是道清淨，應專心作願。是道無濁，心清淨故。是道正直，無有諂曲斷煩惱故。是道安隱，乃至能到涅槃城故。汝等今應作大

善願取莊嚴佛土，隨意所求淨及不淨。』

善男子！爾時樹提摩納在寶藏佛前右膝著地，長跪叉手前白佛言：『世尊！我今發阿耨多羅三藐三菩提心，此不淨世界所有眾生，少於貪婬瞋恚愚癡不犯非法，心無愛濁無怨賊想，捨離慳吝嫉妒之心，離邪見心安住正見，離不善心求諸善法，離三惡心求三善道，於三福處成就善根，於三乘法精勤修習，爾時我當成無上道。世尊！若我所願成就得己利者，令我兩手自然而出白色龍象。』作是言已佛神力故，其兩手中即出龍象，其色純白七處到地。

見是事已告言：『龍象！汝等今者可至虛空去此不遠，遍雨此界八德香水，覺悟此界一切眾生。若有眾生得遇一滴、聞其香氣悉斷五蓋，所謂婬欲、瞋恚、眠睡、掉戲、疑蓋。』作是語已，爾時龍象在虛空中周旋速疾猶如力士善射放箭。是二龍象所作諸事悉成就已，復還來至摩納前住。爾時樹提見是事已心大歡喜。

善男子！爾時寶藏如來即告摩納：『善男子！未來之世過一恆河沙等阿僧祇劫，入第二恆河沙阿僧祇劫，是時有劫名音光明，此佛世界轉名和合音光明，汝於是中成阿耨多羅三藐三菩提，號寶蓋增光明如來、應供、正遍知、明行足、善逝、世間解、無上士、調御丈夫、天人師、佛、世尊。』善男

子！爾時樹提頭面著地禮於佛足，寶藏如來即為樹提而說偈言：

其心離垢 清淨且起 今已授記 能令無量
億數眾生 淨第一道 於當來世 調御天人

善男子！爾時樹提聞是偈已生大歡喜，即起合掌前禮佛足，去佛不遠復坐聽法。三億弟子除一千人其餘咸共同聲發願，於此世界成阿耨多羅三藐三菩提。爾時寶藏如來皆為一一授其阿耨多羅三藐三菩提記，乃至毘婆尸、尸棄、毘尸沙婆最後成阿耨多羅三藐三菩提。

其餘千人悉皆讀誦毘陀外典，其中最大所宗仰者名婆由毗紐，白佛言：『世尊！我今所願當於五濁惡世成阿耨多羅三藐三菩提，為此厚重貪欲瞋恚愚癡多惱眾生說於正法。』

時千人中復有一人字曰火鬘，作如是言：『尊者！婆由毗紐向見何義，願於五濁惡世之中成阿耨多羅三藐三菩提？』其師報言：『是菩薩大悲成就故，於五濁世成阿耨多羅三藐三菩提。爾時眾生無有救護無諸善念，其心常為煩惱所亂諸見所侵，於中成阿耨多羅三藐三菩提，乃能大益無量眾生，善能為作救護依止舍宅燈明，兼復度脫於生死大海，教令安住於正見中，使處涅槃服甘露水。是菩薩摩訶薩欲示現大悲故，願取如是五濁惡世。』

善男子！爾時寶藏如來告婆由毗紐言：『善男子！當來之世過一恆河沙等阿僧祇劫，入第二恆河沙等阿僧祇劫後分之中，東方去此一佛世界微塵數等佛土，有世界名袈裟幢，汝於是中當成阿耨多羅三藐三菩提，號金山王如來、應供、正遍知、明行足、善逝、世間解、無上士、調御丈夫、天人師、佛、世尊。』

爾時婆由毗紐復白佛言：『世尊！若我所願成就得已利者，我今頭面敬禮佛足，惟願如來以百福莊嚴佛之兩足置我頂上。』善男子！爾時婆由毗紐說是語已，尋時敬禮寶藏佛足。

即時如來百福之足在其頭上，復以此偈而讚歎言：

大悲心者 今可還起 智慧明利 行菩薩道
為菩提故 斷除堅牢 諸煩惱縛 當來成佛
能大利益 無量眾生

善男子！爾時，婆由毗紐聞是偈已心大歡喜，即起合掌前禮佛足，去佛不遠復坐聽法。

善男子！爾時，火鬘摩納在寶藏佛前右膝著地，長跪叉手前白佛言：『我今所願，於此世界發阿耨多羅三藐三菩提心。若有眾生三毒等分，不能專心住於善法，其心不善壽四萬歲

，爾時我當成阿耨多羅三藐三菩提。

爾時寶藏如來告火鬘言：『善男子！未來之世過一恆河沙等阿僧祇劫，入第二恆河沙等阿僧祇劫後分之中，此佛世界當名娑婆，何因緣故名曰娑婆？是諸眾生忍受三毒及諸煩惱，是故彼界名曰忍土。時有大劫名曰善賢，何因緣故劫名善賢？是大劫中，多有貪欲瞋恚、愚癡憍慢眾生，有千世尊成就大悲出現於世。善男子！賢劫之初人壽四萬歲，於千佛中最初成阿耨多羅三藐三菩提，號拘留孫如來、應供、正遍知、明行足、善逝、世間解、無上士、調御丈夫、天人師、佛、世尊。為諸眾生說三乘法，令無量眾生在生死者，悉得解脫住於涅槃。』

善男子！爾時，火鬘摩納前禮佛足，卻在一面復坐聽法。

善男子！爾時摩納字虛空，在佛前坐白佛言：『世尊！我於來世，次拘留孫如來之後，人壽三萬歲，我當成阿耨多羅三藐三菩提。』

爾時世尊告虛空摩納言：『善男子！當來之世過一恆河沙等阿僧祇劫，入第二恆河沙等阿僧祇劫後分，入賢劫中娑婆世界，次拘留孫佛後人壽三萬歲，汝當於中成阿耨多羅三藐三菩提，號伽那迦牟尼如來、應供、正遍知、明行足、善逝、

世間解、無上士、調御丈夫、天人師、佛、世尊，有大名稱遍聞世間。』

爾時虛空聞授記已，頭面禮佛右繞三匝在佛前住，以種種華散佛身上，叉手恭敬禮以偈讚佛：

攝護身心	善入禪定	以微妙音	善能教誡
其心清淨	無有濁亂	雖化眾生	不壞世法
名稱光明	及念總持	百福功德	無不增廣
為諸眾生	示現善道	豎仙勝幢	諸功德山
持以利益	無量眾生	悉令一切	功德滿足
又與眾生	善寂滅道	所燒煩惱	如須彌山
於三有中	生大悲心	而與無量	眾生授記

善男子！爾時，第三摩訶字毘舍鞠多，在於佛前以七寶床，床上所敷綉縵茵褥價直十萬兩金，於其床上置真金器盛滿七寶，純金澡罐七寶妙杖，供養世尊及比丘僧。作是施已，白佛言：『世尊！我未來世過一恆河沙等阿僧祇劫，入第二恆河沙等阿僧祇劫後分，入賢劫中，願我成阿耨多羅三藐三菩提。爾時人民壽命損減，初入五濁所有眾生厚重貪婬、瞋恚、愚癡、慳吝、嫉妒，行於邪見隨惡知識，諸不善根以覆其心，於諸善根心沒退失，遠離正見邪命自活。伽那迦牟尼般涅槃後正法滅已，一切眾生盲無慧眼無所師宗，人壽二萬歲，爾時我當成阿耨多羅三藐三菩提。』

善男子！爾時，寶藏如來讚毘舍鞠多言：『善哉善哉！善男子！汝今成就無上智慧，汝當初入五濁惡世，時人壽命滿二萬歲，盲無慧眼無所師宗，汝於是中成阿耨多羅三藐三菩提，今當號汝為大悲智慧。』佛告大悲智慧菩薩：『善男子！汝於來世過一恆河沙等阿僧祇劫，入第二恆河沙等阿僧祇劫後分，入賢劫中人壽二萬歲，汝於爾時得成阿耨多羅三藐三菩提，號迦葉如來、應供、正遍知、明行足、善逝、世間解、無上士、調御丈夫、天人師、佛、世尊。』

善男子！爾時，大悲智慧菩薩尋以頭面禮於佛足，卻住一面，以種種華香、末香、塗香供養世尊，以偈讚佛：

人中之尊	利益眾生	悉能令彼	生愛樂心
念定法門	心得專一	我聞妙音	心大歡喜
智慧方便	無不具足	是故能行	世間教化
又與無量	無邊眾生	授於無上	菩提道記
緣是得見	十方諸佛	智慧神足	皆悉平等
諸佛所有	微妙功德	并及示現	修菩提道
授諸眾生	無上道記	若欲稱讚	不可得盡
是故我今	稽首敬禮		

爾時，寶海梵志復告第四摩納毘舍耶無垢言：『善男子！汝今可發阿耨多羅三藐三菩提心。』

善男子！爾時毘舍耶無垢在佛前住，白佛言：『世尊！我願於此世界賢劫中，求阿耨多羅三藐三菩提，非於五濁惡世之中如迦葉佛所有國土。迦葉如來般涅槃後正法滅已，人壽轉少至十千歲，所有布施調伏持戒悉皆滅盡，是諸眾生善心轉滅遠離七財，於惡知識起世尊想，於三福事無求學心，離三善行勤行三惡，以諸煩惱覆智慧心令無所見，於三乘法不欲修學。是眾生中，若我欲成阿耨多羅三藐三菩提，尚無有人能作遮礙，何況人壽一千歲也！乃至人壽百歲，是時眾生乃至無有善法名字，何況有行善根之者！五濁惡世人民壽命稍稍減少，乃至十歲刀劫後起，我於爾時當從天來擁護眾生，為現善法令離不善法，乃至安住十善法中，離於十惡，煩惱諸結悉令清淨，滅五濁世，眾生乃至壽八萬歲，爾時我當成阿耨多羅三藐三菩提，是時眾生少於貪婬瞋恚愚癡、無明慳吝嫉妒，我於爾時為諸眾生說三乘法令得安住。世尊！若我所願成就得己利者，惟願如來授我阿耨多羅三藐三菩提記。世尊！若我不得如是授記，我於今者當求聲聞或求緣覺，如其乘力疾得解脫度於生死。』

時寶藏佛告毘舍耶無垢言：『善男子！菩薩有四懈怠，若菩薩成就如是四法者，貪著生死於生死獄受諸苦惱，不能疾成阿耨多羅三藐三菩提。何等四？下行、下伴、下施、下願。云何菩薩下行？或有菩薩破身口戒不善護業，是名下行。云

何下伴，親近聲聞及辟支佛與共從事，是名菩薩下伴。云何下施？不能一切捨諸所有，於受者中心生分別，為得天上受快樂故而行布施，是名菩薩下施。云何下願？不能一心願取諸佛淨妙世界，所作誓願不為調伏一切眾生，是名菩薩之下願也。菩薩成是四懈怠法，久處生死受諸苦惱，不能疾成阿耨多羅三藐三菩提。

善男子！復有四法，菩薩成就則能疾成阿耨多羅三藐三菩提。何等四？一、能持禁戒淨身口意，護持法行。二、親近修學大乘之人，與共同事。三、所有之物能一切捨，以大悲心施於一切。四、一心願取種種莊嚴諸佛世界，亦為調伏一切眾生，是名四法，菩薩成就則能疾成阿耨多羅三藐三菩提。

復有四法，菩薩成就能持無上菩提之道。何等四？精勤行於諸波羅蜜，攝取一切無量眾生，心常不離四無量行，遊戲諸通，是名四法，菩薩成就能持無上菩提之道。

復有四法，令心無厭。何等為四？一行施，二聽法，三修行，四攝取眾生，如是四法令心無厭，菩薩應學。

復有四無盡藏，是諸菩薩所應成就。何等四？一者信根，二者說法，三善根願，四者攝取貧窮眾生，是為菩薩四無盡藏具足修滿。

復有四清淨法，菩薩成就。何等四？持戒清淨以無我故，三昧清淨無眾生故，智慧清淨無壽命故，解脫知見清淨以無人故。是為四淨法，菩薩成就以是故疾成阿耨多羅三藐三菩提，轉虛空法輪，轉不可思議法輪，轉不可量法輪，轉無我法輪，轉無言說法輪，轉出世法輪，轉通達法輪，轉諸天人所不能轉微妙之輪。

善男子！未來之世過一恆河沙等阿僧祇劫，入第二恆河沙等阿僧祇劫後分，初入賢劫五濁滅已，壽命增益至八萬歲，汝於是中成阿耨多羅三藐三菩提，號曰彌勒如來、應供、正遍知、明行足、善逝、世間解、無上士、調御丈夫、天人師、佛、世尊。』

爾時，毘舍耶摩納在於佛前，頭面禮足卻住一面，以種種華香、末香、塗香供養於佛及比丘僧，以偈讚佛：

世尊無垢 如真金山 眉間毫相 白如珂雪
應時為我 說微妙法 記我來世 作天人師
誰有見聞 而當不取 仙聖大覺 世燈功德

善男子！爾時寶海梵志一千摩納唯除一人，悉共讀誦毘陀外典，皆已勸化於阿耨多羅三藐三菩提，如拘留孫、伽那迦牟尼、迦葉、彌勒，其第五者名師子光明亦如是。其千人中唯

除二人，其餘皆願於賢劫中成阿耨多羅三藐三菩提。於其眾中最下小者名持力捷疾，寶海梵志復教令發阿耨多羅三藐三菩提心：『善男子！汝今莫觀久遠當離心覺，為諸眾生起大悲心。』爾時梵志即為持力捷疾而說偈言：

陰界諸入	所攝眾生	畏老病死	墮於愛海
閉在三有	可畏獄中	飲煩惱毒	互相侵害
長夜墮在	苦惱海中	癡盲無目	失於正道
久處生死	機關所覆	三有眾生	諸苦熾然
以離正見	安住邪見	周迴生死	五道之中
不得休息	譬如車輪	有諸眾生	失於法眼
盲無所睹	又無救護	汝應修習	無量智慧
令離癡惑	使發菩提	應與眾生	作善知識
為燒愛結	解煩惱縛	應為是等	發菩提心
失法眼者	為癡所覆	為離癡故	應與勝道
生死有獄	大火熾然	與法甘露	令其充足
汝今速往	至於佛所	頭頂禮足	作大利益
當於佛所	發妙勝願	所願勝妙	善持念之
汝當來世	調御天人	常當願施	眾生無畏
拔濟一切	悉令解脫	亦令具足	根力覺道
雨大法雨	投智慧水	滅諸眾生	苦惱之火

善男子！爾時，持力捷疾作如是言：『尊者！我今所願不求生天果報，不求聲聞辟支佛乘，我今唯求無上大乘，待時待

處，待調伏眾生，待發善願，我今思惟如是等事。尊者！且待須臾，聽我師子吼時。』

善男子！爾時寶海梵志漸漸卻行，有侍者五人，一名龍手，二名陸龍，三名水龍，四名虛空龍，五名妙音龍，而告之曰：『汝等今者可發阿耨多羅三藐三菩提心。』五人報曰：『尊者！我等空無所有，無以供養佛及眾僧。未種善根，云何得發阿耨多羅三藐三菩提心？』

善男子！爾時，梵志以左耳中所著寶環持與龍手，右耳寶環持與陸龍，所坐寶床持與水龍，所用寶杖與虛空龍，純金澡罐與妙音龍。如是與已，作是言：『童子！汝今可持此物供養佛及眾僧，發阿耨多羅三藐三菩提心。』

悲華經卷第五

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國